



Inatsisartuni ilaasortaq Jess Svane, Siumut
/maani

Mittarfiit pillugit § 37 naapertorlugu apeqquteqaammut 2019-083-imut akissut

19-02-2019
Suliaq nr.: 2019 - 3772
Id nr. 38177603

Asasara Jess Svane

Inatsisartut suleriaasianni § 37 naapertorlugu mittarfiit pillugit Naalakkersuisunut apeqquteqarputit. Apeqquteqaatit uannut akineqartussanngorlugu ingerlatinneqarpoq, matuma kinguliani allanneqarpoq akissummillu malitseqarluni.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Apeqqut: Illoqarfiit mittarfeqaangittuni Tasiilaq, Ittoqqortoormiit, Qeqertarsuaq, Kangaatsiaq, Qasigianguit, Narsaq Nanortalimmilu mittarfiliortiterluni qaqugu aallartittoqassava?

Akissut: 2019-imi Qasigianguani, Kangaatsiami, Qeqertarsuarmi, Narsami, Nanortalimmi, Ittoqqortoormiini aamma Tasiilami nunap immikkoortuini mittarfiliornissamat aningaasaqarnikkut misissueqqissaarnerup naalakkersuinikkut suliassanngorlugu naammassineqarnissaa naatsorsuutigineqarpoq. Taamatutaaq Uummannami mittarfik nutaaq qiviarneqassasoq partiit naalakkersuisooqatigiit aalajagernikuupput.

Suliassani inuiaqatigiinni aningaasaqarnermut kingunerisassanik misissueqqissaartoqarpoq, taakkulu mittarfiit pillugit Inatsisartut inatsisaanni piunasaqaatinut naammassinniffiunersut naliliinermut tunngavigineqassapput. Tamatumani aningaasaliissutit erniortinneqarsinnaanersut nalikilliliivigineqarsinnaanersullu, ingerlatsineq sinneqartoorfiulluni matussuserneqarsinnaanersooq, sanaartukkat ingerlatsinerlu aningaasartuutissanik allanik pinngitsoortitsisinnaanersut imaluunniit isertitassanik nutaanik pilersitsiviusinnaanersut, kiisalu aningaasaliissutini silaannakkut angallannermi maanna sullissisuusut sullissilertussatullu naatsorsuutigineqartut, taakkulu atortunik toqqaanerat (timmisartut il.il.) eqqarsaatigineqarnersut sammineqarpoq.

Misissuinerit inernerit naammasseriarpata Naalakkersuisut misissueqqissaarnerup inernerit naliliiffigissavaat, taakkulu tunngavigalugit suliap Inatsisartuni ataatsimiittalianut attuumassutilinnut ingerlaqqinnissaanut inassuteqarnermut tunngavigissallugu. Misissuinerup taakkulu aningaasaqarnikkut kingunerisaasa misissuiffigineqarnerisa

inernerisa 2020-mut aningaasanut inatsimmut ilanngunneqarnissaat
naatsorsuutigineqarpoq.

Neriuppunga qulaani allaqqasuni apeqquteqaatit akineqartoq.

Inussiarnersumik inuulluaqqusillunga


Karl Frederik Danielsen